



Basler Bebbi

Alti Garde

Fasnacht 2018

«Alles isch woor...»

(L)Eidestattligi Erkläärig vo de Bebbi – de Alte
Es isch uns egaal, was Ihr vo uns halte

Will mir jetzt neu UNESCO-Kulturerb* sin

*UNESCO = Unlimitiert-Närrisch-Eigendümmliches-Schaabernagg-Collegium

Liggt dr alt Zeedeldichter bi uns nümm dinn!

Är het's zweor e baar Joor no ordeli gmacht

Uus Höflikait hän mer au e baar Mool glacht

Aber jetzt klar missverständlig ihm miesse sage:

«Dy Dichterey längt no knabb für e Waggiswage»

E Schriftsteller muess jetzt aane und wär e Gwinn

Will nit d'Fasnacht, sondern d'Bebbi Kulturguet sin!

Mer hän au ain gfunde, sin saustolz und froh

Är dichtet solo - thurnisch und s'döhnt esoo:

Ig sitze ir Beiz, hocke vor eme Glas Wy

Sött en Zäädel dichte, aber s'fallt mer nüt y

Bi Dichter. My Name isch Bichsel, Bichsel Peter

Bi no nid betrunke, aber sicher denn speeter

Uff d'Froog: «Worum schryybsch?» losst dr Bichsel verluute:

«Ig schryybe, will i das besser cha, als schutte»

Au wenn's dr Peter Bichsel gar nit het gschetzt

Hän mer sy Dichtig simuul-spontan übersetzt

Alles isch woor, was mir Euch doo dien verzelle

Au wenn ain s'Geegedail behaupte sott welle

Denn wär drey Mool liegt – das isch halt esoo

Dä glaubt das denn sälber – so noo dis noo

Drum: Liege duet guet. Lieg mögligscht däägig

Denn d'Wooret isch maischtens unerdräägig

Woor isch:

Dr Michael Bahnert isch jetzt Stil- und Schalberooter

Vo dr Frau Aggermaa, will uff die Frau, die stoohrt er

Me gseeht das an ihre wall-zwyyte Stoff-Emblage au glyy

No immer vom Wiehldisch, aber vo däm vom «Trois Pommes» muess' sy

Sy gryfft bi de Verhülligs-Stoff-Fätze immer die Lätzte

No erger wird's, wenn si in dääre Aaleegi no duet schwätze

Woor isch au:

Vo de Hemmligunggi, ganz bsunders de Lang-Bärtige

Hän mer jo nur ganz friedlichs Gedanggeguet z'gwärtige

Au wenn uns die fanatisch-gläubige Megge

Ihr Hinder fünf Mool am Daag dien aanestregge

Es spiilt gar kai Rollé öbb woor oder glooge

Die gaischtlige Fundis hän s'Rächt immer booge

Was au woor isch, sehr vyyl Alkohol macht schön

Das gseehsch, wenn d'Bebbi ohni Larve doo stöohn

Wär liegt dä griegt e langi Nase

Langi Ohre griege d'Hase

Leider woor isch das:

E langi Nase ka dr Baudepp gar nie ha

Au ohni Langnase stoosst dä überall aa

Und wenn er lacht no liegt er

Und d'Wooret umme biegt er

Duet s'Velo, egaal öbb verbodde, parkiere

S'isch woor, dä Machtmensch goohit ys schwäär an d'Niere

Woor isch, dass sich nüt änderet, will:

Dä Wessels d'Wooret biegt

Bis er sälber glaubt, das, was er liegt

Die Kischte woner de Franzose geeh

Isch kai Million gsi – es isch vyyl meeh

Luegsch dä Oschtschwizer aa – ganz pragmatisch

No isch Dir dr Trump diräggd sympathisch

Hesch drey Mool glooge – hinterenand

No bisch Politiker in jedem Land

D'Wooret isch Liege, Liege, Liege

Will sy dr Hals nie gnueg voll griege

Woor und nit Schnee vo gescht isch:

Dr Trump isch am WEF im verschneyte Davos

Zimmlig frivil uff d'Angela Merkel los

Wo si mit de Händ under ihrer grosse Buuchfalte

S'Dreyeggli macht, het dr Trump das für e Ylaadig ghalte

Me waiss es nit gnau, isch er mit ere ins Bett

Aber scho e Art seggswieswell Verhältnis het

Und spööter sait denn no belaidiget die «Deutsche Kuh»:

«Der amerikanische Präsident HäschTäggMeToo»

Me sait jo langi Nase haige, öbbis wo me nit sott zaige

D'Wooret vom Cortège:

D'Olymper mache nüm am Cortège mit

Das isch e erschte lengscht fällige Schritt

E Stammclique-Demonschtration

Geege die grooss Cortège-Fruschtration

Am Cortège schützt me jetzt neu d'Rösser und d'Ryter

Tamboure und Pfyffer nit, dasch eländ und schyter

D'Ross würde gschützt, will sy wäg em Lärm ummejugge

Jä und wär schützt denn uns vor de Wäge und Gugge?

Mir Bebbi könne und wänn das nit begryffe

Will e Ross, ka jo wäder drummle no pfyffe

D'Wooret vo de Bebbi:

Dä Zeedel isch nit vom Bichsel, was glaubet denn Ihr?

Dasch alles gryymt-glooge, zämmeglooge vo – mir

I lüft jetzt s'Ghaimnis uns sag's Euch jetzt glych

Die ganz Wooret zämmeglooge – han ych

(L)Eidestattligi Erkläärig vo de Bebbi – de Alte

Es isch uns egaal, was Ihr vo uns halte

D Ladäärne-Uusstellig uff em Minschterplatz und d'Waage- und Reggwisyte-Uusstellig bi dr Kasäärne sin vom Määntig znacht bis am Mittwuch

demoorge! Deert und an de 3 Verkaufsständ (CINS) in dr Stadt ka men

au alli Zeedel und Schnitzelbängg, d'Blaggedde und dr Rädäbäng kaufe.